

» de cittadin, tranquillità de suddito, tranquillità de popolo, tranquillità de magistrati, de corpi, de azion, de tutto. Terribile nel so effetto, perchè spojando corpi de facultà la le confonde e la ghe lassa un perpetuo seminario de question.

» Ma Contarini cattivo, che eccita e non forma una proposizion, se spiegasselo almanco quel ch' el vol. Questo per altro non giustifica i obbietti fatti alla proposizion. Nol dise gnente; nol propone. Domando umilmente perdon; el serenissimo Mazor Conseggio non ha dà la facultà de propor al Contarini; el l' ha dada alla Signoria: tocca a ella e non all' eccitante. Se el podesse, el saria a st' ora servido. Sto debito l' ha da pagar la serenissima Signoria, no l' ho da pagar mi. Questo ze un volerme strascinar in una colpa, un far sovvertir le leggi. Questo a nissun privato cittadin ze concesso. Ma disele da senno, che questo ze el so desiderio? Le l' avarave savudo co le l' avesse voludo saver. Ghe l' averave ditto co le me lo avesse domandà in quei loghi, dove el dirlo no ze un delitto. Fin le me ha visto supplice per el ben, per la quiete della mia patria. Le me ha ditto, che sarave stà interrogà. Me aspettava de esser chiamà a render conto dei mii voti e dei voleri del Mazor Conseggio: nessun m' ha ditto gnente. No cerco de imbrojar o de occultar quel che desidero: i mii fini ze onesti, i tende al ben della repubblica.

» Ghe ze stà domandà el bossolo verde, el qual dovesse spiegar, che no ghe ze bisogno de gnente. Ghe zelli sti mali? I ghè. Alle comandà el rimedio? Le l' ha comandà. E ghe vorrà adesso el bossolo verde, che diga, che no ghè bisogno de gnente? Che forma de governo se propone? Zela questa la riverenza ai supremi comandi del serenissimo Mazor Conseggio?

» Ma sto rimedio ze impossibile. E pur sti mali ze stadi altre volte; gho letto le leggi, colle quali allora a sti mali se ha rimedià. I suggerimenti per sti rimedj del 1775 in una scrittura i andava ben e nell' eccitamento i andarà mal? No se pol far? Sarà somma l' autorità de chi lo dise, chiunque el sia: ma a questa